



**Sud Bosne i Hercegovine
Суд Босне и Херцеговине**

**Broj: S1 3 Iž 043748 22 Iž
Sarajevo, 22.08.2022. godine**

Sud Bosne i Hercegovine u Sarajevu, u apelacionom vijeću sastavljenom od sudija Zvezdane Antonović predsjednika vijeća, Vesne Trifunović i Dinke Bešlagić Čovrk članova vijeća, odlučujući o žalbi Adema Zahirovića sa prebivalištem ..., izjavljenoj protiv Odluke Centralne izborne komisije Bosne i Hercegovine broj: 06-1-07-1-608-3/22 od 04.08.2022. godine, o odbijanju upisa u izvod iz Centralnog biračkog spiska za glasanje izvan Bosne i Hercegovine za Opšte izbore 2022. godine, u nejavnoj sjednici, održanoj dana 22.08.2022. godine, donio je

R J E Š E N J E

Žalba se odbacuje kao neblagovremena.

O b r a z l o ž e n j e

Odlukom Centralne izborne komisije Bosne i Hercegovine, broj i datum navedeni u uvodu, odbijen je upis u izvod iz Centralnog biračkog spiska za glasanje izvan Bosne i Hercegovine za Opće izbore 2022. godine po podnesenim prijavama do 19.07.2022. godine, jer nisu ispunjeni uslovi propisani odredbom člana 3.15 stav 1., 2. i 3. Izbornog zakona Bosne i Hercegovine. U odnosu na žalitelja odbijen je upis iz razloga što potpis na prijavnim obrascu ne odgovara potpisu na identifikacionom dokumentu.

Žalitelj je povodom navedene odluke ističe da je obrazac popunio u skladu sa nalogom i da potpis na obrascu odgovara onome na ličnim dokumentima i načinjen je preko jednog elektronskog uređaja. Moli da se žalba proplijedi na rješavanje.

U odgovoru na žalbu Centralna izborna komisija predlaže da se žalba odbaci kao neblagovremena jer podnijeta u zakonom propisanom roku od dva dana od dana objave ožalbene Odluke Centralne izborne komisije BiH na internet stranici Centralne izborne komisije BiH, ili da se odbije kao neosnovana.

Pošto je ispitalo osporenu odluku u granicama žalbenih razloga, vijeće Apelacionog odjeljenja Suda Bosne i Hercegovine odlučilo je kao u izreci iz sljedećih razloga:

Žalba je neblagovremena.

Odredbom člana 6.9. stav 1 i 2 Izbornog zakona Bosne i Hercegovine („Službeni glasnik BiH“ broj 23/01 do 51/22) je propisano da se žalba na odluke Centralne izborne komisije Bosne i Hercegovine podnosi Apelacionom odjeljenju Suda Bosne i Hercegovine, putem Centralne izborne komisije Bosne i Hercegovine, u roku od dva dana od dana objave odluke.

Iz predmeta spisa proizilazi da je ožalbena odluka objavljena je na internet stranici 04.08.2022. godine i da je Centralna izborna komisija BiH žalbu žalitelja zaprimila dana 15.08.2022. godine kada je i upućena putem elektronske pošte. Time je žalba izjavljena protekom roka od dva dana, određenog članom 6.9. Izbornog zakona Bosne i Hercegovine, od dana objavljivanja odluke Centralne izborne komisije BiH o odbijanju upisa u izvod iz Centralnog biračkog spiska za glasanje izvan Bosne i Hercegovine za Opće izbore 2022. godine

Iz navedenih razloga, apelaciono upravno vijeće Suda Bosne i Hercegovine nalazi da je žalba neblagovremena, pa je istu primjenom odredbe člana 52 stav 1 Zakona o upravnim sporovima Bosne i Hercegovine („Službeni glasnik BiH“ broj: 19/02,do 74/10), valjalo odbaciti.

***Predsjednik vijeća
Sudija
Zvezdana Antonović***